

Namminersornerullutik Oqartussat Akileraartarnermi ukiumoortumik naatsorsuutininut il.il. piunasaqaatit pillugit nalunaarutaat nr. 27, 1. december 2006-imeersoq Atuussimasoq (Historisk)

Akileraaruserinermik ingerlatsineq pillugu Inatsisartut inatsisaanni nr. 11, 2. november 2006-imeersumi § 17, imm. 1 aamma 2, aamma § 18, imm. 1 aamma 2, naapertorlugit aalajangersarneqarput:

Atortuuffigisaa

§ 1. Nalunaarummi matumani malittarisassat inuussutissarsiutinik ingerlatsisut suliffeqarfiinut aammalu inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut akisussaasuusunut imaluunniit umiarsuaatileqatigiiffinni ingerlatseqataasunut § 6-imi taagorneqartunut, aningaasarsianit akileraarutit pillugit Inatsisartut inatsisaanni § 1 imaluunniit § 2 naapertorlugit akileraartussaataasunut atuupput.

§ 2. Akileraaruseriffik akileraartussaataasunut ataasiakkaanut qassiikkuutaanulluunniit tamakkiisumik ilaannakortumilluunniit kapitalimi tassani malittarisassanit immikkut akuersissuteqarsinnaavoq.

Suliffeqarfinnut mikisunut naatsorsuutininut ilassutaasumik paasissutissat

§ 3. Inuinnaat inuussutissarsiummik ingerlataqartut, ukiuni naatsorsuuseriffiusuni imminnut malittuni marlunni ukiumut 400.000 koruunit sinnernagit kaaviiartitaqartut, naatsorsuutini inissiinerit pingaarnerit saqqummiutissavaat. Akileraaruseriffiup naatsorsuutini inissiinerit pingaarnerit pillugit nalunaaruteqarnissamut allattuiffissatut atugassat sanassavai. Naatsorsuutini inissiinerit pingaarnerit pillugit paasissutissiissutit nammineerluni nalunaaruummut ilanngullugit nassiunneqassapput.

Imm. 2. Imm. 1-imi aalajangersagaq inuussutissarsiuteqartuni ingerlatseqataasunut soqutigisaqartunut, kommanditselskabini peqataanermigut akisussaasuusunut imaluunniit umiarsuaatileqatigiiffinni ingerlatseqataasunut, akileraartarnermi ukiumoortumik naatsorsuuserinermik naammassinninnissamik aalajangersakkanik ingerlatseqatigiiffinnut soqutigisaqatigiinnut pineqartunut, kommanditselskabini peqataanermigut akisussaasuusunut imaluunniit umiarsuaatileqatigiiffimmuut isumaginnitsitsisunut atuutinngilaq, takuuk § 6.

Akileraartarnermi ukiumoortumik naatsorsuutininik tunniussineq

§ 4. Akileraaruseriffiup nammineerluni nalunaaruteqarnermut tunngavissanik nakkutilliineranut atugassanik nammineerluni nalunaarsuinerimik tunniussinissamut piffissaliunneqartup

qaangiutinnginnerani akileraartarnermi naatsorsuutitut piffissaliussamut naammassineqarsimasumut kingullermut ukiumoortumik naatsorsuutitut akileraaruseriffimmut tunniussineqassaaq, takuulli § 5.

Imm. 2. Akileraartarnermi ukiumoortumik naatsorsuutitut ukiumoortumillu nalunaarut akileraaruseriffiup atugassatut aalajangersagaanut aammalu qanoq isikkoqarnissaanik aalajangigai naapertorlugit digitalinngorlugit suliaralugit tunniunneqarsinnaapput.

§ 5. Illuutini marluk tikillugit attartortitsiviusumik inuussutissarsiutigalugu ingerlatsivik inuinnarnit ingerlanneqartuuppat, § 4 apeqqutaatinnagu akileraartarnermi ukiumoortumik naatsorsuutitut tunniussineqassanngilaq.

Soqutigisaqartunut, kommanditselskabini peqataanermigut akisussaasuusunut imaluunniit umiarsuaatileqatigiiffinni ingerlatseqataasunut

§ 6. Ingerlatseqatigiiffinni soqutigisaqartunut, kommanditselskabini peqataanermigut akisussaasuusunut aammalu umiarsuaatileqatigiiffinni ingerlatseqataasut (peqataasut) akileraartarnermi ukiumoortumik naatsorsuusiornissaq pillugu §§-ini 7-imiit 23-mut aalajangersakkat ingerlatseqatigiiffimmit pineqartumit, kommanditselskabimit imaluunniit umiarsuaatileqatigiiffinni ingerlatseqataasunit naammassineqarnissaat qinersinnaavaat, taassumalu ukiumoortumik naatsorsuutitut naqqiutitaqartunik nassuiaatitaqartunillu peqataasunut isertitaminnut naatsorsuusiornissaminni atugassaattut tunniutissavai.

Imm. 2. Peqataasut akileraaruteqaataasussanik isertitaminnik naatsorsuusiornerminni interessentskabimit, kommanditselskabimit imaluunniit umiarsuaatileqatigiiffimmit peqataanerminni isertitamik immikkoortillugit nassuiaasersussavaat.

Imm. 3. Peqataasut akileraartarnermi piffissanut agguataarineq imaluunniit nalitigut naatsorsueriaaseqarnerit imaluunniit akileraartarnermi nalikilliliinernik ukiumoortumik naatsorsuutini imm. 1-imi taaneqartuni atorineqartunit allaanerusut atorunikkit, naqqiutit immikkut nalunaarutigineqassapput.

Akileraartarnermi ukiumoortumik naatsorsuutitut nalinginnaasumik piumasaqaatit

§ 7. Akileraartarnermi ukiumoortumik naatsorsuutitut periutsit malillugit suliaassapput imaluunniit akileraartarnermi naqqiutinik (nuussinernik) naatsorsuutinullu immikkoortitaarlugit nalunaarsukkat allassimaffiannik imaqassallutik, takukkit §§-it 10-miit 23-mut.

Imm. 2. Akileraartarnermi ukiumoortumik naatsorsuutitut § 8, imm. 1 naapertorlugu paasissutissiissutitaqartut, erseqqissumik paasiuminartumillu akileraaruseriffiup nakkutilliineranut tunngaviliisinnaasuussapput.

Imm. 3. Akileraartarnermi ukiumoortumik naatsorsuutitut nuussineq, ukiup siuliani akileraaruserinermi naatsorsuutitut atasuunera takuneqarsinnaasunngorlugu suliarineqassaaq.

§ 8. Akileraartarnermi ukiumoortumik naatsorsuutitut aammalu paasissutissiissutitut akileraartarnermi

ukiumoortumik naatsorsuutitut tunngaviusunut ilaasut, naatsorsuusianit imalunniit taakkununga atasunik immikkoortitaarlugit nalunaarsukkat nassuiaatinit takuneqarsinnaasariaqarput.

Imm. 2. Naatsorsuusinerineq imatut aqqissorneqassaaq nalunaarsukkat tamarmik akileraatarnermi naatsorsuusianut malinnaavigineqarsinnaasunngorlugit. Akileraatarnermi naatsorsuusiat nalunaarsukkani katiterneqarfigisaminni avissaartinneqarsinnaassapput.

§ 9. Paasissutissiissutit § 8, imm. 2-mi taaneqartut ukiup naatsorsuuseriviusup naaneraniit ukiuni tallimani toqqortarineqassapput.

Imm. 2. Imm. 1-imi aalajangersagaq nioqqutissanik pisinniarfinni ingerlatsiviusut karsiini strimmilinit aamma suliffeqarfiup iluani atugaasunik bilaginit, ukiumoortumik naatsorsuutit atsiorneqarneranniit ukiumi ataatsimi toqqortarineqartussanut atuutinngilaq.

§ 10. Kaaviiartitat ilanngaasikkat nioqqutissanik sullissinernillu ukiup naatsorsuusiorfiusup aallartinnerani naanerani pisassarisat naatsorsuutigalugit naatsorsorneqassapput.

Imm. 2. Kaaviiartitat ilanngaasikkat immikkut nalunaarutigineqassapput. Allap akiligasaanik suliamik ingerlatamut naligititaq, § 13 naapertorlugu kaaviiartitani ilanngaasikkani iluarsiiqqineqarpat, iluarsiiqqineq immikkut ersersinneqassaaq.

§ 11. Aningaasartuutit, tamatumani aamma nioqqutissanik atuineq, akissarsiat allatigullu sulisorisanut aningaasartuutit suuneri malillugit immikkut ersersinneqassapput. Aningaasartuutit sanaartornermut atorineqarsimappata, tamatumunnga nuussineq immikkut ersersinneqassaaq.

§ 12. Nioqqutissanik uninngasuutit immikkut ersersinneqassapput. Ukiup naatsorsuuseriffiusup naanerani nioqqutissanik uninngasuutit ataasiakkaarlugit kisinneqassapput, annertussusaallu kisitsinermi listimi, nioqqutissat ataasiakkaat allattorsimaffianni pisariaqartitsinerlu naapertorlugu ilisarineqarsinnaaffigisaanni takutinneqarsinnaassallutik. Peqqumaasivimmiititat isumannaatsumik uninngasuutitut naatsorsuutit assigisaallunniit tunngavigalugit qaqugukkullunniit naatsorsorneqarsinnaappata, kisitsineq ukiup naatsorsuuseriffiusup naanerinnigisaraluani pisinnaavoq.

Imm. 2. Nioqqutissanik uninngasuutit nalinginik naatsorsuuseriffiusup tunineqarsinnaanngitsut nalinginik ilanngaasoqarsimappat, imaluunniit allat akiligasaanik suliat ingerlasut nalingisa naatsorsorneranni toqqaannartuunngitsumik tunisassiornermi aningaasartuutit, imaluunniit iluanaarutaasussap ilaa, ilanngunneqarsimappata, aningaasat taakkua immikkut ersersinneqassapput.

§ 13. Suliffeqarfiup kajumiissarneqarnermi allanit akileneqartussanik suliat ingerlasut suliassiissutitut ataasiakkaanut agguataarlugit nassuiaateqarfigisinnaasariaqarpat, aammalu naliliineq qanoq ingerlanneqarsimanersoq.

§ 14. Paasissutissiissutit makkua immikkut oqaatigineqassapput:

1) Ukiup naatsorsuuseriviusup naanerani pisassarisat akiitsullu nioqqutissanut sullissinernullu tunngasut.

2) Pisassarisat akiitsullu illuutini qularnaveeqquusiinermi qularnaarneqarsimasut pisassaartut akiligassaartullu taallugit qularnaveqqummullu takunnissinnaanissamut pisariaqartunik paasissutissiissutit.

3) Aningaaserivinnut assigisaannullunniit aningaasaliissutit/ikisat, ilitsiviup aqqanik kontollu normuanik taasilluni, paasissutissat akileraaruseriffimmut nalunaarutigineqarsimangippata.

4) Pappiaqqat nalillit, nalit allanngorarnerisigut iluanaarutit annaasaqaatilluunniit akileraaruteqaataasussaasut, pissarsiarineranni akinik, allassimasumik nalinginik naligititaasunillu taasilluni. Pappiaqqat nalillit sillimaasivimmiititaappata (debot) sillimaasivik aamma taaneqassaaq, paasissutissat akileraaruseriffimmut nalunaarutigineqarsimangippata. Pappiaqqanut nalilinnut erniaqartitaasunut, aallaqqaammut aningaasat amerlassusii imaluunniit akiitsut sinneri qallunaat aningaasaannut aaqqineqarsimasut, pilersinneqarneranni taaneqartumik erniat oqaatigineqassapput.

5) Allatigut pisassarisat imaluunniit akiitsut allat.

Imm. 2. Akiitsoqartunit paasineqartunik annaasaqaatinik ilimagineqartunilluunniit annaasaqaatigissanganik nalikilliliissutit immikkut nalunaarutigineqassapput.

§ 15. Pigisat akileraarutitigut nalikilliliivigineqarsinnaasut, nalikillilerinermut tunngavigisat nakkutiginnissaannut atugassanik immikkoortitaarlugit naatsorsuiffigineqassapput pisariaqartunik nalikilliliinerillu naatsorsorneqarnerannut paasissutissiilluni. Aalaakkaasumik illuutitut atatillugu nalikilliliinermut aamma pigisamik piffissap piginnittuuffigisap tamakkiisumik nalaani nalikilliliinerit nalunaarutigineqarlutik nassuiaatissiineqassaaq.

§ 16. Suliffeqarfik Kalaallit Nunaata avataani pigisaqarpat, tamanna immikkut nalunaarutigineqassaaq, pigisap pissarsiarineranut akia 25.000 koruunit sinnersimappagit paasissutissarlu tamanna suliffeqarfiup ukiumoortumik naatsorsuutaanni ersinngippat. Arlaqartunik pigisaqartoqarpat pigisat suuneri naapertorlugit paasissutissiissutit immikkoortinneqassapput.

§ 17. Namminerisanik aningaasaatit naatsorsorneranni nioqqutissanik nammineq atuineq aningaasartuutinullu peqataanerit il.il. immikkut takutinneqassapput.

§ 18. Aningaasartuutit isertitallu imaluunniit pigisat akiligassallu akornanni illuatungiliineqarsimappat (modregning), kisitsisit ilanngaasernagit takutinneqassapput.

§ 19. Makkua immikkut oqaatigineqassapput:

- 1) Ilassininnermut aningaasartuutit.
- 2) Akileraaruteqaataasusaanngitsunik ajunngitsorsiat, angalanermut il.il. akilikkat.

§ 20. Isertitat aningaasartuutillu nalinginnaasumik ingerlatsinermut pinnani allamut tunngasut immikkut isertitatut immikkullu aningaasartuutit takutinneqassapput suunerilu tunngavigalugit nassuiaateqartinneqassallutik, pingaaruteqarpiartuunngitsutut oqaatigineqarsinnaasuunngippata. Taamatulli agguataarinissaq aningaasaliinernik ingerlatsivinnut atuutinngilaq.

Akileraaruseriffimmut paasissutissat nalunaarutigineqartut naatsorsuiffigineqarnerat

§ 21. Nalunaaruteqarnissamut paasissutissiisussaataasut akissarsiat aamma honorarit il.il., naatsorsuutini ilaasut annertuussusii immikkoortiterlugit paasissutissiisutigissavaat, aningaasarsiallu il.il. annertussusiinik paasissutissiissapput, akissarsiallu il.il. akileraaruseriffimmut akileraaruserinermik ingerlatsineq pillugu Inatsisartut inatsisaanni § 30, imm. 1 aamma 3 naapertorlugit, aningaasarsianit akileraarutit pillugit akileraaruseriffimmut nalunaartarneq pillugu nalunaarut naapertorlugu, nalunaarutaasimasunik naligiissarinermik takutitsillutik.

§ 22. Ernianik nalunaaruteqarnissamut paasissutissiisussaataasut kaammattorneqarnermi ernianit isertitat aningaasartuutillu, naatsorsuutini ilaasut annertussussaannik paasissutissiisuteqassasut ernianillu, isertitanit akileraarutit pillugit akileraaruseriffimmut nalunaartarneq pillugu nalunaarut naapertorlugu, nalunaarutigineqarsimasunik naligiissaarinermik takutitsillutik.

§ 23. Nalunaaruteqarnissamut § 21 aamma § 22-mi taaneqartutut paasissutissiisussaataasut ukiumut naatsorsuuserivik qaammatsiutit malillugit ukiumit allaanerusoq atorpagu, immikkut paasissutissiineri aningaasat nalunaarutigineqarsimasut qaammatsiutit malillugit ukiup agguataarnerinut naatsorsuuserinerimut atorneqartunut qanoq agguataarsimanerat takutissinnaassavaat.

Pineqaatissiinerit atuuttussanngorfialu

§ 24. Kinaluunniit, piaaraluni imaluunniit soqqusaatumik mianersuaalliornikkut, § 3, imm. 1, § 4, imm. 1, § 6, imm. 2 aamma 3, § 7, imm. 1 aamma 3, imaluunniit §§-it 8-miit 23-imut unioqqutitsisoq akiliisitsinikkut pineqaatissinneqarsinnaavoq.

§ 25. Nalunaarut 1. januar 2007 atuutilerpoq

Imm. 2. Ilutigitillugu Ingerlatsinerimut naatsorsuutininut nammineerluni nalunaarsuiffimmut ilanngunneqartussanut piumassarineqartut minnerpaat pillugit Inatsisartut nalunaarutaat nr. 8, 26. juni 1979-imeersoq aturunnaarsinneqarpoq.

Namminersornerullutik Oqartussat, ulloq 1. december 2006

Josef Motzfeldt

/

Kaare Hagemann